

求恕齋
叢書

四庫全書表文箋釋

二

四庫全書表文箋釋卷二

茂名林鶴年纂

吳興劉承幹校

欽惟

皇帝陛下

瑞席蘿圖

神凝松棟

史記秦始皇本紀曰今陛下興義兵誅殘賊又蔡
邕獨斷曰陛階也所由升堂也天子必有近臣立
於陛側以戒不虞謂之陛下者羣臣與天子言不
敢指斥故呼在陛下者與之言因卑達尊之意也
淮南子覽冥訓曰援絕瑞席蘿圖注曰羅列圖籍
以爲席蓐一說蘿圖車上席也言瑞應也路史曰
帝堯立於雲扉雲生牖坐於華堂松生棟○按此
至合鑄九金之鼎一段言先校 內府舊藏之書
及採永樂大典中遺書

播威棱於十曲響震靈夔

漢書李廣傳武帝答書曰是以聲名暴於夷貉威
棱憚乎鄰國李奇注曰神靈之威曰棱馬驢釋史
引歸藏曰昔黃帝殺蚩尤於青邱作柁鼓之曲十
章一曰雷震驚二曰猛虎駭三曰驚鳥擊四曰龍
媒蹀五曰靈夔吼六曰雕鶚爭七曰壯士奮志八
曰熊羆哮吼九曰石墜崖十曰波蕩壑○按黃帝
事唐書儀衛志載之略同恭讀 御製詩四集卷
三十二將軍阿桂奏攻克勒烏圍賊巢紅旗報捷
喜成七言十首以當凱歌又卷三十五將軍阿桂
奏攻克噶喇依賊巢紅旗報捷喜成凱歌十首卷

三十七於郊臺迎勞將軍阿桂凱旋將士等成凱
歌十首十曲句意蓋指此

洽文德於四溟兆開神鷺

詩江漢篇曰矢其文德洽此四國齊書樂志曰庶
物盛長咸殷阜恩澤四溟被九有國語周語曰周
之興也鷺鷥鳴於岐山說文曰鷺鷥鳳屬神鳥也
○按此聯言我 朝武功文德之盛指當時平定
新疆兩金川等處恭讀 御製詩三集卷二十一
詠鷺鷥爾詩敘曰尙書阿桂還自伊犁以所獲鷺

鸞爾進乃者新域旣屯旣城綏遠所徵繫誌實是
賴則思曩日剡筇之雄風紀今時鳴岐之雅則不
其遯乎爰仍其名令郎世甯爲之圖而系以詩曰
鸞鸞爾何出伊犁沙水潯戍還因致此烏譜絕難
尋項背如雛雉閒關學戴鴛白斑黑尾點黃暈赤
睛深忽得玃京闕能無憶故林聊將紀殊域非是
寶珍禽神鸞句意蓋指此

帝嬀歌詠已題九萬瓊箋

晉木華海賦曰昔在帝嬀巨唐之代注曰帝嬀謂

舜尙書舜典曰詩言志歌永言傳謂歌詠其義以
長其言也永與詠同又益稷帝庸作歌曰敕天之
命惟時惟幾宋洪興祖語林曰王右軍爲會稽守
內史謝安就求箋紙庫中有九萬板悉與之○按
此述 御製詩文之評詠 天祿琳瑯鑒藏舊板

書籍題識簡端者恭讀 御製詩四集卷二十五

天祿琳瑯鑒藏舊板書籍聯句臣陸費墀詩注曰
曾經 御題者計三十二種又卷三十三注曰自

臨御以來所作詩已經編刊者初集四千一百
五十六首二集八千四百八十四首三集一萬一

千五百一十九首自壬辰至乙未詩未經刊者三千九百五十七首通計共二萬八千一百一十六首又御製詩集提要云自乾隆三十七年至四十八年計詩九千七百餘首編爲四集統合三萬三千九百五十餘首甲辰以後未宣布者尙不知其數焉

臣向編摩更緝三千寶牘

劉向校書敘錄曰臣向所校讐中孫卿書凡三百二十二篇宋眞德秀大學衍義表曰不量菲薄欲

效編摩史記滑稽傳曰東方朔初入長安至公車
上書凡用三千奏牘人主從上方讀之二月乃盡
○按此言當時諸臣奏請修書者恭讀 御製詩
四集卷二十一題宋人勘書圖有寄謂新編四庫
者漢家中壘可能如之句

博收竹素仍沿天祿之名

漢劉珍東觀漢記曰劉向典校書籍皆先書竹改
易刊定可繕寫者方上素竹者竹簡也素者縑素
也三輔黃圖曰天祿閣藏典籍之所漢宮殿疏曰

天祿麒麟閣蕭何造以藏祕書處賢士也○按此
述乾隆四年奉 上諭中外搜訪遺書以備校勘
鑒藏舊板書籍者恭讀 御製詩四集卷二十五
天祿琳琅鑒藏舊板書籍聯句注曰舊藏宋金元
明板書籍彙爲天祿琳琅

珍比琳琅永付長恩之守

尙書禹貢曰厥貢惟球琳琅玕鄭注曰美石也又
抱朴子曰人主文則琳琅墮於筆端武則鉤銘摧
於指掌致虛雜俎曰司書鬼曰長恩除夕呼其名

而祭之鼠不敢嚙蠹魚不生○按此言天祿琳琅
鑒藏書籍貯於 昭仁殿者恭讀 御製詩四集
卷二十五題五經萃室宋板五經詩注曰天祿琳
瑯弄藏宋板經部五經內惟春秋乃南宋岳珂所
刊其餘四經皆不能逮也近日得宋板周易尙書
詩經禮記四部均有相臺岳氏木記與天祿弄藏
春秋係一時所刊五經萃聚真不啻豐城之合耳
臣福隆安聯句詩注曰謹按是書每部用乾隆
御覽之寶及天祿琳琅兩璽自乾隆甲子年重裝
以來凡有所得均籤書年月以誌鑒藏先後又臣

陸費墀聯句詩注曰內最善本如前漢書資治通鑑綱目九家注杜詩等書皆命寫御容於簡端

乃猶尋端竟委溯支絡於詞源

蔡邕釋誨曰君子推微達旨尋端見緒內經素問注曰絡謂正經之旁支隋書文學傳敘曰筆有餘力詞無竭源○恭讀御製詩四集卷二十五天祿琳琅鑒藏舊板書籍聯句臣陸費墀詩注曰御製三閣記並以水言文涵漚萬有源委一貫以

四部爲六義乃詩之淵源也

緯地經天探精微於義海

左昭二十八年傳曰經緯天地曰文又國語曰經之以天緯之以地經緯不爽文之象也禮記經解曰絜靜精微易教也抱朴子曰正經爲道義之淵海子書爲增深之川流○按此聯言前時天祿琳瑯鑒藏書籍未多至乾隆辛卯壬辰兩載又屢詔訪求遺書

昭陽韶歲

特紬翰府之藏

余疋釋天曰太歲在癸曰昭陽梁元帝纂要曰孟
春曰首歲又曰肇歲又曰芳歲又曰華歲史記太
史公自敘曰紬史記金匱石室之書劉熙釋名曰
紬抽也郝經詩曰文林剡荆棘翰府開蹊徑○按
此以下述乾隆三十八年癸巳正月安徽學政朱
筠奏搜採永樂大典及提要之法遂得 旨允行
命出內府所藏祕籍分司校閱恭讀 御製詩
四集卷十五詠經畬書屋卽事有遺書搜索佐文

治大典因題永樂時之句再按李光地年譜載康熙二十六年光地奏秦漢以後禮壞樂崩六經雖經宋儒闡明然永樂閒所修大典未免蕪雜疏漏宜大徵天下之士蒐羅羣言討論編纂然則搜採永樂大典修輯全書之舉光地已發於先

永樂遺編

俯檢文樓之帙

明史藝文志曰永樂大典二萬二千九百卷永樂

初解縉等奉敕編文獻大成既竣帝以爲未備復
敕姚廣孝重修四歷寒暑而成更定是名唐書章
懷太子傳曰往聖遺編咸窺壺奧唐顏師古大業
拾遺記曰帝嘗幸昭明文選樓○按此述乾隆三
十八年奉 上諭將永樂大典中書籍詳細檢閱
恭讀 御製詩四集卷十一命校永樂大典因成
八韻示意序曰翰林院署庋有永樂大典一書蓋
自皇史宬移貯者初不知其名也比以搜訪遺籍
安徽學政朱筠以校錄是書爲請廷議允行奏旣
上勅取首函以進見其採掇蒐羅極爲浩博且中

多世不經見之書雖原冊亡什之一固不足爲全體累也第彼別部區函意在貪多務得細大不捐而編韻分字踳雜不倫由當時領書局者惟一姚廣孝因而濫引緇流逞其猥瑣之識雅俗並陳舉釋典道經悉爲闌入其奚當於古柱下史藏書之義乎因命內廷大學士等爲總裁掄選翰林官三十人分司校勘先爲發凡起例俾識所從事蕪者芟之龐者釐之散者裒之完善者存之已流傳者弗再登言二氏者在所擯取精擇醕依經史子集爲部次俟其成附之剞劂當以四庫全書名之夫